



A MONSEIGNEUR  
LE DVC DE

VENDOSME. ~~1763~~

*Ex libris Hæ Genouefa Parisiensis.*



ONSEIGNEUR,

Le decez n'agueres aduenu de N. S.

P.le Pape Clement 8. m'a donné sub-

iect & occasion pendant la vacance, de

rechercher plus particulièrement ce qui estoit de

l'election des Papes, & des formes d'y proceder,

tant anciennes que modernes. Estimant n'estre

chose cōuenable de s'adonner tant a la recherche

des moindres antiquitez estrangeres, comme font

aucuns, y employans tout leur estude, qu'on ignore

ce qui est de nostre temps, & autres choses qui nous

apartiennent & nous touchent de plus pres. I'en

ay donc faict vn petit recueil, en intention seule-

ment que ce fust pour mon particulier, a fin d'y

auoir recours au defaut de ma memoire a l'adue-

nir. Mais mon deuoir, pour l'honneur que me fai-

ctes de vous enquerir de mes estudes & d'en auoir

soing, m'ayant obligé de vous en donner aduis,

non seulement vous l'avez desiré voir, comme est

vostre affection incroyable de tousiours entendre

*Supplément  
au catalogue*

Et cognoistre toutes choses louables & honnestes,  
avec vn esprit & courage qui surpasse vos ans:  
mais aussi l'ayant veu, auez trouué bon qu'il fust  
imprimé & publié. Ne venant point mal a propos  
a la suite de Rome, que ie vous ay cy deuant pre-  
sentée reduicte au petit pied, selon la proportion  
de mon âge de quatorze ans. Ce sera donc a vous,  
Monseigneur, que ceux, qui voyans ce traité y prē-  
dront quelque contentement, en sçauront le gré:  
Comme aussi ceux qui par vne façon fastueuse,  
mesprisent & desdaignent tout, sinon ce qu'ils font  
eux mesmes, auront a faire contre vous, & non  
contre moy, qui ne fay que vous obeir & suiure  
vostre volonté comme ie doy: n'ayant autre des-  
seing que de faire paroistre en toutes sortes que  
ie suis,

MONSEIGNEVR,

Vostre tref-humble & tref-  
obeissant seruiteur.

HIEROSME BIGNON.

A Paris ce 18. Avril.

1605





TRAICTE  
SOMMAIRE  
DE L'ELECTION  
DES PAPES.

CHAPITRE. I.

*Diuerſes façons dont il a eſté autrefois  
procedé à l'election des Papes.*



A maniere de creer & eſlire  
le Pape à Rome, a eſté di-  
uerſe ſelon la diuerſité des  
temps.

Aucuns ont voulu dire,  
que du commencement celuy qui eſtoit  
Pape deſignoit & ordōnoit ſon ſucceſſeur:  
& qu'en ceſte ſorte S. Pierre auoit eſtabli  
S. Clement, pour regir & gouuerner l'E-  
gliſe apres luy, ſuiuant ce que raporte le  
meſme Sainct Clemēt en l'epiſtre premie-

## Traicté touchant

re *ad Iacobum fratrem domini*, ou il dict que Sainct Pierre preuoyant la fin de sa vie, se leuant en presence de toute l'assemblée des Chrestiens, & le tenant par la main dist à haute voix, *Clementem hunc Episcopum vobis ordino, cui soli meæ predicationis & doctrinæ cathedram trado*. Mais cela estant demeuré sans exemple, & n'ayant depuis esté fuiui, on n'en peut faire de regle, n'ayant mesme forti effect. D'autant que S. Clemēt ne succeda point à S. Pierre: ains ce fut Linus, & apres luy Cletus: & S. Clement ne fut que le troisieme depuis S. Pierre. On trouue toutesfois escript que Linus & Cletus auoient esté aussi choisis par S. Pierre, non pas pour successeurs, ny pour vaquer à la parole & a l'oraison, ny pour auoir la puissance Pontificale de lyer, & deslyer: mais seulement pour ayde & secours aux choses exterieures & temporelles: comme il est dict au Canon *si Petrus. 8. quest. 1.* Autres ont tenu que S. Clement ne voulut point se preualoir de cest establissement, non tant par modestie que par vne inspiration diuine: de peur que l'exemple de telle nomination ne fust tiré en consequence, & qu'il ne fust d'autant diminué du pouuoir & autorité de l'Eglise, à choisir & establir vr



## *l' Election du Pape.*

4

Pasteur. Se fondans sur ce qui est escript en Epiphanius, *Heresi* 27. que S. Clement dist qu'il s'en alloit, & se retiroit, afin que le peuple de Dieu fust establi ἀναχωρῶν, ἀπειμι, ἐνσταθήτω ὁ λαὸς τῷ θεῷ, rapportant ces mots de l'une des epistres d'iceluy saint Clemēt. Toutesfois le mesme Epiphanius, recite encore vne autre opinion, de ceux qui disoient que S. Clement, en auroit usé selon l'usage des Apostres d'autant qu'ayāt a faire voyages en autres pays pour y annoncer & publier l'Euangile, a ce que la ville de Rome ne demeurast sans Pasteur, il y establit Lin<sup>9</sup>, & que depuis il fut contrainct de reprendre ceste charge. Au demeurant par le canon des Apostres 76. le droit de succession, & institutiō hereditaire est defendu & reprouué en l'Eglise. Comme aussi par le Cōcile d'Antioche chap. 23. il n'est pas loisible à vn Euesque, se voyāt sur la fin de sa vie, de choisir & mettre en sa place vn successeur. Dont on peut cognoistre que cela auoit esté usurpé par aucuns Euesques, desquels nous auons assez d'exemples. Il est bien certain que depuis S. Clement, tous les Papes ont esté faits & créez par les suffrages & du Clergé, & du peuple qui estoit Chrestien en la ville de Rome. Ce

## *Traicté touchant*

qui ne peut receuoir de doute. Et y assistoient pareillement les Euesques des autres prouinces qui estoient lors a Rome, comme on peut voir par l'Epistre de saint Cyprian, 52. *Ad Antonianum, de Cornelio & Nouatiano*, Et cela fut obserué iusques au schisme qui aduint entre Damasus & Ursicinus, enuiron l'an de nostre Seigneur trois cents soixante neuf.

Car lors Damasus ayant esté esleu Pape par vne partie du peuple & Clergé, Ursicinus par vne autre partie : & chacun deux soustenu par les siens, se voulant maintenir en ceste dignité, cela fut cause de grandes esmeutes & seditions, iusques a venir aux armes. En sorte qu'un iour se trouuerent dans vne Eglise cent trête sept corps morts comme rapporte Ammian Marcellin au liure 27. Qui fut cause que depuis l'Empereur interposa son auctorité, ordonnant en cas de tel schisme celuy quil vouloit demeurer Pape. Et ainsi Damasus fut establi par l'auctorité de l'Empereur Valentinian. C'est ce Damasus, homme de grande vertu & erudition, duquel S. Hierosme a esté Secretaire.

Quelque temps apres, estant aduenue pareille diuision entre Eulalius & Bonifacius



*l' Election du Pape.*

5

cius, grandes seditions esmeuës a ceste occasion en la ville de Rome, Symmachus lors gouuerneur, n'ayant peu y donner ordre, apres plusieurs contentions, diuerfes relations, requestes & mandemens rapportés par Symmachus en ses epistres, en fin de la plaine puissance & auctorité de l'Empereur Honorius, Boniface premier demeura Pape. Ceste dignité ayant esté auparavant comme sequestrée par l'Empereur, & commise à l'Euesque de Spolette, qui estoit lors, pendant les festes de Pasques. Et ainsi en aduint lors de la diuision entre Symmachus & Laurentius: dont le Roy Theoderic ayant voulu cognoistre en vne assemblée tenuë à Rauenne, confirma Symmachus.

Et depuis, cessant la cause du schisme, pour obuier aux tumultes & desordres qui pouuoient aduenir, l'Empereur auoit de coustume d'interuenir tousiours en telles electiōs. Et a la parfin on en vint à ce point, que l'election du Pape faicte par le peuple & le Clergé, n'estoit point valable, si elle n'auoit esté confirmée par l'Empereur: n'osant celuy qui estoit esleu prendre la cōsecration, sans la volonté & consentement du Prince. Auquel pour ce droict de con-

## *Traicté touchant*

firmation on bailloit quelques deniers.

Ceste maniere d'en vser dura iusques au temps de l'Empereur Constantin 3. lequel esmeu par la saincteté de vie du Pape Benedict 2. qui estoit en l'an 686. luy enuoya vne constitution, par laquelle il estoit ordonné, que a l'aduenir celuy qui auroit esté esleu par le Clergé & le peuple de Rome, feroit incōtinent tenu pour vray Vicaire de Iesus-Christ : sans attendre ny l'autorité de l'Empereur de Constantinople, ny de l'Exarque d'Italie residant à Rauenne.

Depuis en l'an 773. le Pape Hadrian premier au concile de Latran, ou il y auoit cēt cinquante trois Euesques assemblez en l'Eglise de saint Sauueur à Rome, par leur aduis donna la puissance d'essire & establir le Pape à Charlemagne Roy de France, depuis fait Empereur de l'Occident, pour auoir chassé les Lombards d'Italie. Le decret en est raporté par Gratian au Canon *Hadrianus dist. 63.*

Mais cela ne dura pas long temps. D'autant que depuis, l'Empereur Loys le Debōnaire fils de Charlemagne, se despartit de ce droict, du temps du Pape Paschal premier, & remist au Clergé & peuple de Rome la pleine & libre puissance d'essire &



créer le Pape: laquelle demeura & eut lieu par vn long temps. Mais le Pape Leon 8. ayant esté maintenu au siege avec armes, par l'Empereur Othon 1. en recompense de ce bien faict, & indigné de l'inconstance & diuersité du peuple, transporta toute l'autorité d'eslire & créer le Pape en la personne de l'Empereur Othon 1. enuiron l'an 963.

Les succeffeurs d'Othon ont vsé de ce droit & priuilege, iusques au temps de l'Empereur Henry 4. sous lequel le Pape Gregoire 7. auparauāt nommé Hildebrād, qui fut esleu en l'an 1073. le rendit derochef au Clergé & peuple Romain: & bien tost apres le Pape Paschal 2. l'ayant remis entre les mains de l'Empereur Henry 5. le reuoqua tout incontinent.

En l'an 1059. le Pape Nicolas 2. au Concile de Latrá 4. fist vn decret touchāt l'election du Pape: contenant que premierement les Cardinaux Euesques doiuent traiter par entre eux de l'election, & apres en conferer avec les autres Cardinaux, & faire approuuer & consentir l'election par eux faicte, par tout le peuple & Clergé de Rome, vsant de ces termes, *Vt Cardinales Episcopi diligentissime simul de electione tractātes,*

## Traicté touchant

*mox Christi clericos Cardinales adhibeant: sic que reliquus clerus & populus ad consensum nouæ electionis accedat. Can. In nomine. Dist. 23.* Ce qui accreut & augmenta beaucoup l'auctorité & dignité des Cardinaux. Et neantmoins depuis, les Empereurs ne se vouloiēt point despartir de leur pretention, cōme il a esté touché cy deuant. Mais apres, peu à peu le droict est demeuré en la main des Cardinaux seulement, tant Euesques, que Prestres & Diacres.

En fin Gregoire 10. au concile de Lyon, en l'année 1274. apres vn long scisme, & pour y obuier à l'aduenir, institua la maniere d'eslire le Pape par les Cardinaux, qui feroient enfermez en vn mesme lieu, appelé le Conclauē, cōme estant sous vne mesme clef, sans aucune muraille, cloison ny tapisserie entredeux. Et ce en la ville, & dans le Palais, où le Pape dernier feroit decédé: n'ayans que chascun vn seruiteur & en cas de grāde necessité deux: en sorte que personne ne peust y entrer, ny en sortir, ny conferer par lettres, messagers, ou autrement avec iceux Cardinaux, iusques à ce qu'ils eussent crée vn Pape: auxquels par chascun iour on porte le viure ordinaire par vne fenestre outour, tel qu'on void



*l' Election du Pape.*

7

aux monasteres des religieuses. Et si dās les trois iours qu'ils seroiēt entrez, ils n'auoiēt parfaict l'electiō, il est dict que par l'espace de cinq iours ensuiuans, ils n'aurent qu'un seul plat, tant au disner qu'au souper. Et apres cela s'ils demeurent plus long temps, qu'on ne leur baillera sinon du pain, du vin & de l'eau, iusques a ce qu'ils ayent esleu le Pape. Et qu'apres le deces du Pape, on doit differer dix iours, pour attendre les Cardinaux absens, auant que d'entrer au Conclau. Sans que toutesfois l'entrēe leur soit desniēe s'ils suruiennent puis apres, la chose estant encore entiere. Cela mesme confirmē par le Pape Clement 5. lequel par sa constitution a deffendu que telle forme ne peust estre corrigēe, changēe, ny modifiēe par les Cardinaux le siege vaquāt, & qu'on ne peust en oster ou y adiouster aucune chose, ny s'en dispenser en facon quelconque. Mais par vne bulle du Pape Clement 6. il y a eu quelque moderation, tant pour la forme du Conclau, ou il a estē permis faire des separations, & dresser des cellules pour chascun Cardinal avec des tapisseries seullement, que pour les viandes qu'on leur porte plus abondamment, qu'il n'est ordōnē par la constitution de Gregoire 10.

## *Traicté touchant*

En quoy mesme aujourd'hui on n'observe aucune rigueur. Mais toutesfois la loy y est, dont on pouroit user, si on voyoit qu'il en fust de besoin.

Depuis au Concile de Constance, en la session 40. estant qu'estion d'eslire vn Pape, il fut ordonné, que pour ceste fois la tant seulement, on adiousteroit avec les Cardinaux, six Prelats ou autres personnes Ecclesiastiques de chacune des cinq nations principales qui estoient en ce Concile: A sçavoir de l'Italie, France, Espagne, Angleterre & Allemagne, lesquels entreroient au Conclau & auroient voix electiue comme les Cardinaux: En sorte que celuy qui seroit esleu par les deux tiers des Cardinaux & les deux tiers des adioustez de chacune nation, seroit tenu pour vray Pape. Ce qui fut ainsi executé, & suiuant cela entrèrent au Conclau dressé au Palais Episcopal de Constance, avec vingt-quatre Cardinaux qui s'y trouuerent, trente Prelats deputez de chacune des cinq nations pour cest effect. Et lors fut esleu Pape Othō Colonne, l'vnziesme iour de Nouembre 1417. feste de S. Martin; & pour ceste rencontre, il print le nom de Martin 5. Dont on ne peut faire de regle, estant dict que



c'estoit pour ceste fois la tant seulement. Toutesfois nous trouuons que depuis, au Concile de Basle, presque le semblable fut obserué: quand apres la destitution faite par le Concile du Pape Eugene 4. Il fut ordonné qu'il seroit procedé a l'election d'un autre, par trente-deux personnes, qui furent choisies & adioustées avec le Cardinal Alamanus Archeuesque d'Arles. Par lesquels fut esleu Amedee absent, auparauant Duc de Sauoye, & lors viuant solitairement en un Monastere, qui print le nom de Felix 5. l'an 1439.

Il reste donc de toucher vn peu plus particulierement tout ce qui est de la forme & de l'ordre, dont on vse auiourd'huy, en telle election & de tout ce qui se faict & passe au Conclau.



CHAPITRE 2.

DE LA FORME ET  
ORDRE DONT ON VSE,

*Et procede de present en l'ele-  
ction du Pape.*



Ncontinent que le Pape est dece-  
dé, & mesme quelques fois deslors  
qu'on void, ou qu'on a aduis des  
Medecins qu'il est a l'extremité, les Cardi-  
naux qui se trouuent a Rome font assem-  
blee en la salle du Consistoire segret, pour  
aduiser au gouuernement de la ville &  
pourueoir aux affaires de la vacâce. Et lors,  
le siege vacant, sont vestus de roquests &  
Mozzetes, sans cappes, en signe de iurisdic-  
tion. Et le peuple va faire la garde en ar-  
mes aux portes de la ville, & aux palais des  
Cardinaux & autres endroicts.

Le lendemain, les Cardinaux font con-  
gregation en mesme lieu, a mesme effet, &  
pour les affaires qui se presentent, & aussi  
afin de pourueoir à dresser & préparer ce-  
qui



qui est necessaire pour tenir le Conclaue.

Puis on porte le corps du Pape decedé dedans l'Eglise de S. Pierre ordinairement, sinon en cas que le Pape decedé eust esleu sa sepulture autre part. La assistent tous les Cardinaux qui se sont trouuez à l'assemblée. Le corps mort est reuestu d'ornemens Pontificaux, & mis dans vn chàlit en l'Eglise ou en vne chappelle d'icelle, ou le peuple luy va baiser les pieds.

Les iours suiuians, les Cardinaux font les exeques du Pape: Et tient on assemblée en la sacristie de S. Pierre, ou les Ambassadeurs des Princes ont de coustume d'entrer & faire des remonstrances & discours touchant l'election qui est a faire.

Pendant la vacance, le grand Camerier gouuerne Rome. Mais il ne se faiet aucune expedition en la chancellerie Apostolique, iusques a ce qu'il y ayt vn nouveau Pape. Et de fait, aussi tost que le Pape a rendu l'esprit, le Vicechancelier prend les bulles ou seaux, & publiquement faiet rompre, raturer & oster le costé ou est escript le nom du Pape decedé, en sorte qu'on n'en puisse seeller. Et l'autre costé auquel sont grauez les chefs des Apostres S. Pierre & S. Paul, l'envelope dans vn linge, qu'il cachette de

## *Traicté touchant*

son ſeël, le mettant entre les mains du Camerier. L'office duquel, enſemble des Penitentiars, dure pendant la vacance: Et s'ils venoient a deceder, les Cardinaux y pourroient pourueoir, pour le temps d'icelle vacance tant ſeulement, par la Clementine *Ne Romani, De Electione*.

Dix iours apres la mort du Pape, on dit la Meſſe du ſainct Eſprit: Et icelle finie en chantant l'hymne *Veni ſancte Spiritus*, les Cardinaux entrent dans le Conclaue.

Le Conclaue à Rome ſe tient en vn lieu ioignant l'Egliſe de S. Pierre, dans le palais du Pape en la Chappelle de Sixte, eſgalle a vn grand Temple, ou eſt pourtraict le dernier iugement, c'eſt excellent ouurage de Michel Ange: & aux lieux attenãs qui ſont les ſalles & chambres du palais de S. Pierre qu'on dreſſe cōme en forme d'un dortoir de conuent, hors mis qu'il y a pluſieurs grandes allées, & autres petites, & par ordre des cellules ou chambrettes, ou les Cardinaux logent. Duquel Conclaue font partie la chappelle Pauline & la ſalle Royale, ou on ne dreſſe point de cellules. Et les portes, fenestres baſſes & aduenues ſont cloſes & murees de telle ſorte, qu'on ne puiſſe communiquer avec ceux qui y ſont.



Entrez qu'ils sont dans le Conclauē, ils tiennent assemblee en la chappelle Pauline, ou on aduise a tout ce qui est du gouuernement du Conclauē, & le mesme iour on reçoit le sermēt des officiers deputez a la garde du Conclauē, tāt dehors que dedās.

Du cōmēcemēt qu'ils sont entrez, le Cōclauē demeure ouuert, par quelque petit espace de tēps, & lors les Ambassadeurs des Princes ont de coustume d'y entrer & faire des recōmādatiōs & sollicitatiōs en faueur de celuy ou ceux qu'ils sçauēt estre les plus agreables, & pl<sup>9</sup> affectiōnez par leur Prince.

Après cela on ferme le Conclauē muré de toutes parts, fors vne aduenue ou il y a vn guischet à plusieurs ferrures & diuerses clefs, ou est la garde des Sauelles, & lors il n'est plus loisible d'y entrer, ny de cōmuniquer en façō quelcōque avec persōne estāt au dehors, soit par lettres messagers ou autrement, ny en sortir pareillemēt iusques à ce que le nouueau Pape soit crée, sinō en cas qu'il arriuaſt quelque Cardinal auquel pendant le Conclauē l'entrée est tousiours ouuerte.

Et neantmoins est a remarquer, que tous Cardinaux n'ont droit d'y entrer, sinon qu'ils soient Euesques, Prestres, ou Diacres

### *Traicté touchant*

pour le moins. Car les Cardinaux sousdia-  
cres n'y ont point de voix ny d'étrée. Tou-  
tesfois nous trouuõs que le Cardinal d'Au-  
strie n'estant que Soubz-diacre, entra au  
Conclau de Sixte 5. par le moyen d'un  
breuet de Gregoire 13. par lequel cela luy  
auoit esté octroyé, qu'il representa quand  
on luy voulut refuser l'entree.

Par chascun iour, on leur porte leur pro-  
uision necessaire, qu'on leur baille par cer-  
taines fenestres, ou tours à la façon de ceux  
qu'on void aux couuens des Religieu-  
ses. Et au deuant des aduenues il y a tri-  
ple garde, dont la plus proche du Con-  
clau est des Prelats qui sont à Rome: les-  
quels prennent garde à ce qu'on ne puisse  
communiquer à ceux qui sont enfermez  
au Conclau: & pour c'est effect regardent  
les plats & vaisseaux, & font recherche s'il  
n'y a point quelque lettre cachee, en ce  
qu'on leur porte.

Chacun Cardinal estant dans le Con-  
clau ne peut auoir plus de deux hommes  
pour le seruir, lesquels s'appellent Concla-  
uistes, sinon que pour indisposition ou grã-  
de vieillesse il ait esté permis a quelques  
vns d'en auoir trois.

Le Conclau estant fermé, le iour sui-



uant le Doyen des Cardinaux celebrant la Messe, donne la sainte Cōmunion a tous les Cardinaux.

Après les Conclauistes s'assemblent en la chappelle Pauline, en presence du Maistre des Ceremonies, afin d'estre recogneus & pour voir si le nombre n'excede.

Aussi des le commencement le Maistre des Ceremonies lit la bulle de Pie IV. par laquelle il est dict que tous les Cardinaux entrans dans le Conclau, doiuent faire & prester le serment.

Or tous les iours, en la chappelle Pauline vn des Cardinaux celebre la Messe du S. Esprit. Et on procede a l'election du Pape, qui se faict le plus souuent par deux manieres, sçauoir l'vne par scrutin, & l'autre par adoration.

Le scrutin se fait en ceste sorte. Chacun Cardinal escrit dans certain billet de papier son aduis & suffrage, & à la fin de la Messe le va porter dedans le grand calice d'or, qui est sur l'autel. Puis tous les billets sont r'enuersez sur vne petite table, qui est mise pour cest effect deuant l'autel. Il ya trois des Cardinaux, lesquels au veu & en presence de tous les autres, deployent ces billets, prononçans à haute voix le nom de

## *Traicté touchant*

celuy qui se trouue nommé en chascun d'eux, & les autres Cardinaux escriuent & marquent en vne fueille de papier le nombre des voix que chascun peut auoir, pour cognoistre celuy qui en a le plus.

En quoy est a noter que pour eslire & creer vn Pape, il faut qu'il ayt les deux tiers des voix de tous les Cardinaux qui sont dans le Conclaué par la constitution du Pape Alexandre 3. rapportée au chapit. *Licet de vitanda, De electione*, aux Decretalles. Que si par tel scrutin il ne s'en trouue aucun qui ait les deux tiers, alors & a l'instant mesme on iette dans le feu tous les billets, affin que le tout demeure secret & assoupy pour obuier aux haines & partialitez qui en pourroient autrement proceder. Et par ce moyen la partie est remise a vne autre fois, qu'on faict & recommence vn autre scrutin en la mesme forme : lequel a cause de ce a accoustumé d'estre repeté & reiteré par plusieurs fois, iusques à ce que les deux tiers se rencontrent en vne mesme personne. Ce qui aduint rarement par la voye du scrutin. De sorte qu'on est contraint d'auoir recours a l'adoration. Toutesfois le defect du nombre des voix au scrutin est quelques fois supplée par les



*Accessi* qu'on appelle. C'est quand ceux qui auoient donné par leur billet leur voix & suffrage a quelque autre, declarēt qu'ils la donnent a celuy qu'ils voyent auoir plus de voix : vsans de ces termes *Accedo ad Cardinalem talem*, d'ou est venu le mot des *Accessi*. Et a ce qu'il ne se puisse commettre de fraude, celuy qui donne sa voix par tel *Accesso* dit, qu'on regarde son billet, qui contient telle deuise au dessus, & que l'on cognoistra qu'il en auoit nommé vn autre. Et ce de peur qu'il n'aduint que celuy qui auroit donné sa voix a quelqu'un par son billet, ne la baillast derechef par ceste forme d'*Accesso* au mesme: qui seroit deux voix d'une mesme personne au lieu d'une.

Les billets dont ils vsent sont faicts en ceste façon : Le Cardinal qui veut donner sa voix, prēd vn fueillet de papier en forme languette comme d'une bande: & au bas il escrit son nom: puis l'ayāt plié de quelques plis, il le cache par les deux bouts d'un cachet extraordinaire, qu'on ne puisse cognoistre estant faict expres a ceste fin. Et apres il faict escrire sur le long de ce billet par son Conclauiste, le nom du Cardinal auquel il donne sa voix en ces termes : *Ego eligo in summū pontificem Reuerendiss. Dominum*

## *Traicté touchant*

*meum Cardinalem* N. Puis on plie ce billet de plusieurs plis, & au dessus on met quelque deuise a la volonté du Cardinal, affin que sans d'esploier on les puisse recognoistre par ceste deuise exterieure, s'il en est besoin.

Quelques fois par le billet on donne sa voix à trois diuerses personnes par clauses distinctes & separees en diuerses lignes. Dont l'effect est tel que le billet peut seruir seulement à celuy qui se trouue auoir plus grand nombre d'autres voix.

Il y a encores vn autre sorte de scrutin, qu'ils appellēt ouuert, ou *apertis vocibus*, qui est que les Cardinaux estans assemblez, disent a haute voix celuy qu'ils eslisent, peu vité si ce n'est par la voye de *l'Accesso*.

L'autre maniere qui est l'adoration, c'est, quand les Cardinaux estans assemblez en la chappelle, se tournent vers celuy qu'ils desirent estre faict Pape, & luy font la reuerence, plians le genoil fort bas: & quand il se trouue que les deux tiers sont allez en ceste sorte a l'adoration, le Cardinal adoré est faict Pape.

Et encores que ceste maniere se rapporte a celle election qui est appellée par les anciens & en droit Canon, *Per inspirationem*  
& tenue



& tenue pour estre la voye du S. Esprit: qui estoit quand tous d'une voix sans traicté ny scrutin precedent, sans aucune formalité, se rencontroient comme par vne inspiration diuine à dire, qu'il failloit faire vn tel Pape, esgallemēt desiré d'un chascū.

Toutesfois, ceste forme d'adoratiō n'est pas estimee d'aucuns si legitime & valable comme le scrutin: d'autant que par le moyen des brigues & partialitez, il s'y peut commettre de la fraude & de la violence: les plus foibles estans attirez a l'adoration par l'exemple des plus puissans, & les plus timides, induicts par les plus resolut. Et souuentefois il aduient, que ceux qui ne voudroient consentir en l'election de quelqu'un par suffrage libre, voyans l'impetuosité de l'adoration, se laissent conduire & emporter, affin de monstrier qu'ils ont part en telle election, & ne veulent estre des derniers, de peur de desplaire & d'encourir la mauuaise grace de celuy qui seroit esleu. A cause dequoy apres l'election parfaicte par adoration, on a accoustumé de reprendre le scrutin. Mais c'est seulement pour la forme, & sans preiudice de l'election ja faicte.

Tout cecy se faict en la chappelle Pau-

## Traicté touchant

line lieu destiné a eslire le Pape.

Il y auoit cy deuant vne troisieme maniere d'eslire le Pape, par forme de Compromis. C'estoit quand tous les Cardinaux conuenoient de la personne d'aucuns d'entre eux auxquels ils se rapportoiēt de choisir & eslire celuy qu'ils estimeroient le plus capable. Mais ceste façon bien que ce soit l'une des trois manieres d'election approuuées au chap. *Quia propter, De Electione*, aux Decretales, n'est plus en vsage à Rome: dont aucuns veulent dire la cause estre, par ce que ce pouuoir de nommer vn Pape, apres la mort d'Alexandre 5. ayant esté donné à Balthazar Cossa lors Cardinal de S. Eustache, il se fist Pape luy mesme, D'autant *Ego sum Papa*: parce qu'il disoit ne trouuer autre personne plus capable de telle charge, & fut appellé Iean 23. Lequel depuis fut depose au Concile de Constance en l'an 1417.

### CHAPITRE 3.

*De ce qui s'observe quand l' Election est parfaite, & apres.*

**Q**Vand les deux tiers des voix se rencontrent en vne mesme personne, soit par le scrutin secret ou ouuert, ou par le moyen des *Accessi*, ou par la voye d'ado-



ratio, cestuy la sans doubte est le vray Pape. Toutesfois les autres Cardinaux ont accoustumé d'y apporter aussi leur consentement. Et lors le premier Cardinal Euesque, tous les autres estans assis, prononce & declare au nom de tout le College qu'il eslit vn tel pour Pape. Et luy demande sa volonté, laquelle ayant declaree, & accepté telle election, tous se leuent pour luy gratifier, & a l'instant luy mettās son Rochet, le font seoir sur vn siege paré, qu'ils mettent deuant la table, proche de l'autel: luy baillent l'anneau du pescheur: luy demandent, & font dire & declarer de quel nom il veut estre appellé.

Ceste forme de changer de nom ayant esté introduicte, receue & vsitee depuis le Pape Iean 12. qui fut esleu en l'an 955. estāt au parauant nommé Octauius. Toutesfois aucuns ont voulu rapporter ceste institution au Pape Sergius 2. qui fut en l'an 844.

Donques ayant declaré le nom qu'il veut prendre, il a accoustumé de soubscrire les constitutions qui auoient esté conuenues & iurées par tous les Cardinaux, auant l'election, & signer quelques suppliques & requestes.

Cependant le premier des Cardinaux

## Traicté touchant

Diacres, ouurant vne petite fenestre, dont le peuple qui attend peut voir & estre veu, fait mōstre d'une croix, criant a haute voix, en ces mots: *Annūtio vobis gaudium magnum. Papam habemus. Reuerendiſſ. Cardinalis Florentinus electus est in summum Pontificem, & elegit ſibi nomen Leo. II.*

Cela faiēt il eſt deſpouille' par les Cardinaux Diacres de ſes veſtemens communs, qui appartiennent aux clerics des ceremonies, & reueſtu de tous les habits Pontificaux: & le faiſans ſeoir ſur l'autel tous les Cardinaux de rang luy vont faire la reuerence, en luy baiſant les pieds, les mains, & la bouche.

Pendant cēs entrefaiētes, toutes les portes du Conclauē ſont ouuertes, les barrières & murs, dont les aduenues, portes & fenestres eſtoient cloſes & murees, ſont rompues, & r'enuerſees: Les ſoldats comme de force entrent confuſemēt: & meſme prennent & pillent tout ce qu'ils trouuent en voye.

Voyla pourquoy, quand on void que quelqu'un s'en va faiēt Pape, les Conclauistes ſont diligēce de ſerrer, r'amaſſer & enfermer tout ce qui eſt de meilleur, appartenant a leur Cardinal. Et pareillement le



peuple a accoustumé se ietter dans la maison de celuy qui est esleu & la piller. Telle licence ayant esté vsurpée de long temps. Pour laquelle corriger fut faict vn decret au Concile de Constāce, Session 41. ou cela fut par expres prohibé & deffendu cōme estant vne coustume abusive fondée sur ce qu'on pretēd que celuy qui est esleu estant parvenu au comble & sommet des richesses, ses biens apartiennent à celuy qui les occupe & s'en empare le premier. Ioinct que sous tel pretexte on pilloir quelquesfois les biens de quelques Cardinaux estans dans le Conclauē supposant qu'ils eussent esté esleuz. Ce nonobstant telle coustume est demeuree, sinon que on peut pourueoir & donner ordre, afin de l'empescher.

Au mesme temps, le nouueau Pape est porté dans l'Eglise de S. Pierre, accompagné des Chanoines & Chantres de ceste mesme Eglise, qui chantent *Ecce Sacerdos magnus*, &c. Et apres s'estre prosterné en terre, & faict sa priere, il est mis dans la grande & haute chaise Pontificale, ou se dict solennellement: *Te Deum laudamus*. La derchef en pleine assemblee, & multitude de peuple, qui y vient a grand' foule, il est

### *Traicté touchant*

adoré par les Cardinaux, Euesques, Prelats & autres. Et lors il donne absolution generale, & sa benediction a vn chascun avec beaucoup de solennité, & ceremonies, qui emportent pleine indulgence: & incontinent apres il est porté dans le Palais de S. Pierre, reueré d'vn chacun, & dont il recoit le contentement tel qu'on peut estimer.

Quelques iours apres, avec grande pompe & magnificence, le nouveau Pape est solennellement couronné en la place élevée qui est deuant le portail de S. Pierre, sur vn portique richement orné & paré, & luy est mise sur la teste la tiarre ou triple couronne, appelée le Regne. Sigebert & Aimoinus ont escrit, que ceste couronne enrichie de plusieurs pierres precieuses & beaux ornements, ayant esté enuoyee a Clouis Roy de Frâce par l'Empereur Anastase, Clouis l'enuoya en don a l'Eglise de S. Pierre de Rome.

C'este couronne est mise sur la teste du Pape, par le premier des Cardinaux Dia-cres, auquel ce droit appartient, & se font alors plusieurs belles ceremonies. Entre autres le Maistre des ceremonies mettant du feu dans des estoupes, en se tournant vers le Pape, crie a haute voix, *Pater sancte, sic*



*transit gloria mundi: Omnis caro fœnium, & omnis gloria eius sicut flos agri:* ce qui se reitere par trois fois deuant que d'entrer dans l'Eglise de saint Pierre. De la il va en procession a Saint Iean de Latran. Laquelle processio toutesfois de present est volontiers remise a vn autre iour: à cause qu'il y a fort loing, comme pres d'une lieue. Et est le Pape accompagné de tous les Cardinaux & Prelats qui se trouuēt a Rome, de tous ses officiers & de beaucoup de Seigneurs & Gentils-hommes: & c'este procession se faict a cheual, comme par forme d'une magnifique entrée, avec grandes pompes & solennitez: ce qu'on appelle aussi prendre la possession. En passant en certain endroit, les Iuifs luy viennent au deuant le genouil en terre, luy presentent leur loy, laquelle ils louent & exhortent sa sainteté qu'il ayt à la reuerer, aquoy il respond qu'il la reuere, comme donnée de Dieu: mais blafme leur vaine superstition de ce qu'ils sont encore à attendre le Sauueur, lequel est venu lōg temps y a, qui est nostre Seigneur Iesus Christ. L'ordre, la forme & les magnificences de ceste procession, seroient longues a représenter. Et en diuers endroits on iette de l'argent parmy le peu-

## *Traicté touchant.*

ple, & principalement ou la presse est la plus grande, pour la diuertir.

Estant arriué à S. Iean de Latran, il est receu par les Chanoines de ceste Eglise qui luy viennent au deuant, & la se font encore plusieurs belles ceremonies: Entre autres estant le Pape assis fort bas en telle sorte qu'il semble estre couché par terre, il est releué par les mains des Cardinaux, qui disent ce verset, *Suscitat de puluere egenum, & de stercore erigit pauperem: vt sedeat cum principibus & solium gloria teneat.*

A l'issue de telles solennitez le Pape a accoustumé de faire festin a tous les Cardinaux.

Autre chose est de la Consécration, qui se faiet quand le Pape esleu n'auoit au parauant esté consacré Euesque: auquel cas il est consacré & oinct en la teste & aux mains par le Doyen des Cardinaux qui est l'Euesque d'Hostie assisté de deux Cardinaux Euesques, en presence de tous les autres, avec plusieurs autres solennitez & ceremonies.

*Fin de ce Traicté.*